

CBETA電子佛典集成

CBETA Chinese Electronic Tripitaka Collection
ebook

T02n0140

阿那邠邸化七子經

後漢 安世高譯

中華電子佛典協會



目次

- [編輯說明](#)
- [章節目次](#)
- [卷目次](#)
 - .001,
- [贊助資訊](#)

編輯說明

- 本電子書以「CBETA 電子佛典集成 Version 2022.Q3」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

No. 140 [No. 125(51.7)]

阿那邠邸化七子經

後漢安息國三藏安世高譯

聞如是：

一時，婆伽婆在舍衛祇樹給孤獨園。爾時，阿那邠邸有七子，無篤信於佛法眾，彼不歸命佛、歸命法、歸命比丘僧，亦不改殺生，亦不改不與取，亦不改他姪，亦不改妄語，亦不改飲酒。爾時，阿那邠邸長者告彼七子言：「汝等今可自歸命佛、歸命法、歸命比丘僧，亦莫殺生，莫不與取，莫他妻姪，莫妄語，莫飲酒，皆悉莫犯。」彼子作是語：「我不堪任歸命佛、歸命法、歸命比丘僧，莫殺、亦不與取、他姪、妄語、飲酒，皆不堪任。」阿那邠邸長者言：「我當賜汝千兩金，汝等可歸命佛、歸命法、歸命比丘僧，改莫殺生、不與取、他姪、妄語、飲酒，皆悉改之。」爾時，七子已得千兩金，便歸命佛、歸命法、歸命比丘僧，改不殺生、不盜、不他姪、不妄語、不飲酒。

時阿那邠邸長者，與彼七子各賜千兩金已，授三自歸、受五戒，便往園至世尊所，頭面禮足在一面坐。時阿那邠邸白世尊言：「我於此間有七子，無篤信意，亦無歡喜心於佛法眾，不自歸命佛、歸命法、歸命比丘僧，亦不改殺生，不改盜，不改他姪，不改妄語，不改飲酒。世尊！時七子各各賜千兩金，便使歸命佛、歸命法、歸命比丘僧，而授五戒。云何世尊？彼七子頗有福善諸功德，使後有所獲不？」

世尊告曰：「善哉善哉！長者！多饒益眾生，欲安隱眾生天人得安。長者！彼七子緣是功德，諸善功德皆悉具足，諦聽彼七子所因功德諸善所獲果報，我今當說。此北方有國，城名石室，國土豐熟

人民熾盛，彼有伊羅波多羅藏，無數百千金銀、珍寶、車璩、馬瑙、真珠、琥珀、水精、瑠璃、及諸眾妙寶。彼捷陀賴國人，七歲中七月七日，或以被盛抱戴，隨其所欲皆悉費用，然彼伊羅鉢多羅藏無所減少。若復長者！彼七子及此伊羅鉢多羅大寶藏，彼七千兩金，百倍、千倍、百千倍、無數倍，皆悉不及汝七子所獲功德。長者！復有國名迦陵璩，有城名蜜絺羅，穀米豐熟人民熾盛，彼有寶藏名般籌，無數珍寶金銀、車璩、馬瑙、真珠、水精、琉璃、珊瑚、琥珀，乃至迦陵璩國人民，七歲七月七日中，隨意所欲擔負多少，無所減少，然彼迦陵璩國有所減少。若復長者七子，所有七千兩金，及般籌大寶藏，於彼七千兩金，百倍、千倍、百千倍、無數倍，皆悉不及七子七千兩金，所獲功德而無與等。復有長者！鞞提師國，城名須賴吒，賓伽羅大寶藏，無數百千珍寶藏，金銀、車璩、馬瑙、真珠、琥珀、水精、琉璃，於彼鞞提師國，七歲七月七日中，隨其所欲擔負多少，皆負持去，於彼賓伽羅寶藏無所減少。若復長者七子七千兩金，及賓伽羅寶藏，此七子七千兩金，百倍、千倍、百千倍、無數倍，皆悉不及七子所獲功德，不可稱計。復有長者！加尸國波羅奈城，彼有藏名蟻伽(龍名)，無數金銀、珍寶、車璩、馬瑙、水精、琉璃、真珠、琥珀，彼七子七千兩金，及此蟻伽大寶藏，彼七子七千兩金所獲功德，百倍、千倍、百千倍、無數倍不如也。長者！置此乾陀越國人，捨此迦陵璩人，捨此鞞提施人，捨此迦尸人，猶如此閻浮提十六大國男女大小，彼盡隨其所欲擔負取此四大寶藏，金銀、珍寶、車璩、馬瑙、真珠、琥珀、水精、瑠璃，彼於七歲七月七日中，隨其所欲皆悉擔負持去，彼四大藏無所減少。長者！彼七子七千兩金，及此四大寶藏，百倍、千倍、百千倍、無數倍皆悉不及。」

是時世尊，便說偈言：

「伊羅鉢乾陀， 蜜絺及般籌，
賓伽及須賴， 蟻伽波羅奈。」

如此四寶藏， 種種珍寶滿，
無數不相及， 所作功德果。」

爾時，世尊與阿那邠邸，說微妙法勸令歡喜。時阿那邠邸長者，已從如來聞微妙法，即從座起偏露右肩右膝著地，叉手向佛白世尊言：「願世尊，當受我請及比丘僧，欲設甘露飲食，為彼七子故。」時世尊默然受阿那邠邸請。時阿那邠邸已見世尊默然受請，頭面禮足便退而去，還家即其日，施設甘露飲食，施設甘饌飲食已即敷坐具，為佛比丘僧故而白時到，「今正是時，願世尊臨顧。」是時世尊知時已到，便著衣持鉢，比丘僧前後圍繞，入舍衛城詣阿那邠邸家，即就座坐及比丘僧。時，阿那邠邸長者及七子便至世尊所，頭面禮足在一面坐，時，阿那邠邸長者白世尊言：「我有此七子，各賜千兩金，使自歸命佛、歸命法、歸命比丘僧，使受五戒。今願世尊，與此等說法，使我等七子，於如來所使逮等見。」時，世尊告阿那邠邸長者言：「如是長者！如是長者！」時阿那邠邸長者，見佛比丘僧坐定，及七子以甘饌飲食而供養之。時阿那邠邸長者及七子，甘饌飲食飯佛比丘僧，見世尊食竟除去鉢，時，阿那邠邸長者便至世尊所，頭面禮足在一面坐。時彼七子，如來與說微妙法，而世尊知阿那邠邸七子至心聽法，諸佛世尊常應所說法苦習盡道，時世尊與彼阿那邠邸長者七子，說如是法，各於坐上諸塵垢盡，無有瑕穢得法眼生。彼已見法，逮得深法無有狐疑，亦無猶預想得無所畏，以解了如來深法，自歸命佛、歸命法、歸命眾，而受五戒。時世尊與阿那邠邸長者及七子，復重說法已，便從座起而去。

是時，阿那邠邸長者及彼七子，聞佛所說，歡喜奉行。

阿那邠邸化七子經

[CBETA 贊助資訊](#)

(<https://www.cbeta.org/donation/index.php>)

自 2001 年 2 月 1 日起，CBETA 帳務由「財團法人西蓮教育基金會」承辦，並成立「財團法人西蓮教育基金會」－ CBETA 專戶，所有捐款至 CBETA 專戶皆為專款專用，歡迎各界捐款贊助。

您的捐款本協會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與聯合信用卡中心合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

[前往捐款](#)

信用卡（單次 / 定期定額）捐款

本授權書可提供單次捐款或定期定額捐款之用途。

請於下載並填妥捐款授權書後，請傳真至 02-2383-0649，並請來電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 [授權書](#) (MS Word 格式)

劃撥捐款

郵政劃撥帳號：1 9 5 3 8 8 1 1

戶名：財團法人西蓮教育基金會

欲指定特殊用途者，請特別註明，我們會專款專用。

線上信用卡 / PayPal 捐款

PayPal 是一個跨國線上付款機制的公司，CBETA 引用其服務，提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project .

相關收據開立事宜，由於付款幣別為美元，我們除了會依您所贊助之美元金額開立收據外，另我們會依捐款當日公告匯率開立台幣收據，此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex- cheques, remittance, etc.,) please entitle to "The Seeland Education Foundation".
